



小石山房叢書

1 曾 4
622
164



門 4
第 622
卷 16



虞東先生文錄卷五

傳

陳清端公家傳

公清德重望上結主知下孚輿論既已紀之太史
載在司勳足以垂世不朽矣而國史所錄類舉其
大不及覩縷餘事其孫南康太守子恭屬予補綴遺
軼藏之家乘以示後人因據狀採掇詳于諸生作令
時事作陳清端公家傳

公諱瑄姓陳氏字文煥一字眉川海康人世族單寒祖父
皆潛德弗耀公始以進士起家歷官都察院右僉都御史
巡撫湖南福建追授禮部尙書賜謚清端詔入賢良

祠公少貧茹苦力學年十九補郡學生丁內外艱毀家庀
喪葬生計日索饘粥時不繼然試輒冠軍以故從學者衆
得束脩羊稍贏輒分贍親故雖日不舉火勿恤也迥翔諸
生間久始以年例貢成均又四年登賢書明年甲戌成進
士初雷陽勦立義館當事延公掌其教多所成就釋褐歸
諸生復邀公講學其中里居五年足跡未嘗及公門于人
世苞苴無絲粟染每謂貪不在多得一二非分錢便如千
百萬後嘗舉此人對實未仕時律身如此謁選得福之古
田令古田穴山而居丁田淆錯賦役輕重歆民逋逃轉徙
黠悍者或嘯聚山林奸吏葉牙其間狙詐喜事挾持短長
涖斯土者率坐累去公襪被之官卽條具八事請于大吏

行之而賦平役均民以蘇息報最調臺灣復陳便宜十二
事以興學廣教爲首務時臺邑歸化驍悍不馴公任事五
年而民知禮讓已入爲刑曹郎轉兵曹分校禮闈稱得士
尋奉命視四川學政以崇德厲學爲文章根本校課之
餘留心民瘼作金川六要論上之行省未及代調巡臺廈
臺故舊治至卽請革官莊除酷吏恤番民鼎新學宮建紫
陽祠于側示人以格致誠正之學海外如鄒魯時撫閩者
爲儀封張公相倚如左右手閩人至今樂道之前後在臺
八年遂巡湖南以監司膺節鉞蓋曠典也明年移節福建
三載報績稱治行第一事具史傳卒年六十有三雷郡東
有洋田萬頃爲海康遂溪錯壤堤岸一十七處海潮沖噬

幾盡潮水漫溢田廬民失業公嘗告諸當事倡議捐修無
應者及爲聞撫乃奏請興築焉公自筮仕古田至爲巡撫
二十年子身于外未嘗延致幕客父子曠隔數千里不能
具舟車通往來謙從一二人官厨惟進瓜蔬皆人情所萬
不堪者而公恬然處之終其身非卓有定力者能然歟
聖祖嘗目爲苦行老僧又謂從古清官未有如瓊者亮
哉 聖主之知人也公居家孝友在族黨間恂恂謹子
弟率又似絕無奇特者其盛德君子也夫

司業陳先生傳

先生名祖范字亦韓姓陳氏見復其自號也上世爲侯官
人宋少師古靈先生後有元大者嘉熙初進士遊子朱子

門學者稱北山先生徙家常熟故先生爲常熟人祖煌圖
前翰林院典籍父逢午隱居教授先生之在母也有異徵
生而秀穎年十二賦錦衣歸故里詩落句云緼袍吾亦適
長揖見公卿先生一生行檢定于此矣自爲舉子業卽經
名師指授如江都郭述堂長洲韓寒碧同里嚴思菴皆得
其端緒然先生所得則在抉經之心見道之卓其形于言
者允修而踐之而非徒外之文也年四十八中雍正癸卯
進士朝野慶得人將對大廷慮無不得上第者遽以足蹇
告歸遂不復出入或以是尤先生或更推以爲高皆非也
先生自言及今尙可止過此則義不當止勢又不能自止
故堅持已意如此其上座主書曰古人仰答知己豈必名

位云爾哉修身砥行不得罪于聖賢其亦可矣是則先生之志也先生既絕意仕進乃僦屋江臯與吟社諸君相讌樂一時名流膺集延緣葦間有伊人宛在之致雍正十年天下開設書院遠近爭致書幣相邀先生或辭或就然皆終歲爲期不獲已再往旋託故去蓋以士習難醇師道難立不欲以此溷廩祿也晚歸邑居嘗製自序一篇陳述已志時先生年七十三矣閱二年 詔舉經明行修之士需不次用中外署先生名者四上 天子命閣部大臣檢核先生衰然居首 報可 賜國子監司業以年老勿遣稽古之榮前此未嘗有也又數年卒年七十有九先生沖淡元素如定僧處女與之交如飲醇耐雖巖陵躁妄斷斷不

可人者對先生輒心融意釋惔然氣下豈非盛德之感有潛移默奪者耶先生菑畬典訓于六經三史及唐宋以下諸儒論著披尋研味露纂雪抄投老不倦爲文謹于持擇而於說經加慎謂摭拾餘瀋既不可安憑臆妄談彌成痼痼多聞而擇多見而識不且愈于不知而作乎嘗手書貽鎮極論其事所著有經咫上下卷掌錄上下卷詩文集八卷其掌錄文稿皆經進 御蒙 上評隲又昭文縣志若干卷江南通志若干卷今並行世

馮行貞小傳

馮行貞字服之常熟人六世祖玘以甲科起家歷官福建按察副使有顯績祖復京積學善著述與廬江何仲容及

同里顧塵客仲恭兄弟爲文字交立清圓真正之法世無
知者父班守家法學不務苟得尤遂于詩出入義山樊川
間與兄舒掎摭詩家利病爲騷壇主盟卽世推二馮先生
也貞儀觀修偉拓落有大志不能頰首研席齷齪作洛下
生聞邑中張某善行糊往盡其術嘗山行遇虎挺短槍斃
之如獵豚犬尤善射能以後矢落前矢投石百步外所著
處輒如志或云其腰間常帶二鐵丸以錦囊貯之人莫識
其用會吳逆煽禍 天兵南征貞謁軍門以策干聞帥聞
帥異之錄置帳下委以偏師挫賊鋒或陷陣深入無能難
者賊帥趙鼎臣聚衆嵐岵山扼險拒王旅衆議環其山貞
曰賊恃險而固吾師遠來仰攻之萬一小衄則軍心沮矣

乃單騎入其營召鼎臣與語順逆利害鼎臣曰方動貞遽
叱曰若所否者當速殺我不然舉軍降耳賊相顧失氣遂
聽命大軍得前進滇南平以功上格部議遽歸築草堂于
白茆之鄒港授徒餬口嘗謂馮氏自唐衍後不得伸其志
者多矣未有坎壈如己者往往綴小詞見志間作繪事有
奇致年六十餘竟以貧死

論曰余總角時聞客談馮先生事輒問馮先生何如人先
君子感然曰此故李將軍也數奇不得封侯耳先生旣歿
遺一小藤篋封識甚密發視之皆隨征時聞帥所給劄凡
十餘紙好事者焚其墓下昔人歎大將軍告身止易一醉
今告身一篋乃代一陌紙錢也悲夫

王有譽家傳

王有譽字處伯一字葭游常熟人曾祖載仕邑諸生事具別傳祖攀龍父翬並以畫聞而翬名尤著時邑中擅絕技者曰黃鼎足跡半天下尤在秦蜀間久故其所作多離奇俶詭或古人所未到然亦坐是多病敗翬則陶鑄董巨舍跨關李譬諸詩家鼎其青蓮而翬則少陵也翬嘗繪南巡圖進御廟堂嘉歎議官之翬不樂仕進遽歸一時名賢巨卿投詩攀援卒不可得有譽神慧迥出九歲能背誦騷選作白勵文見志年十五補學官弟子名籍甚尤邃于詩溧陽狄向濤太史毗陵惲鶴生孝廉暨同里錢曾王巖武伯諸前輩並折輩行與交郵筒往來無虛日時父翬方

名重公卿間諸貴人爭欲因翬致其子而有譽負奇盛氣視諸貴人蔑如也初有譽嘗從東海尚書問學尚書被召入都欲挈之行有譽佯醉不答翌日投以所作鷗詩有春波浩蕩疇馴得肯向仇池託宿來之句尚書頗悵快竟弗顧有譽挾其所長謂功名可戾券致不當依傍人故厚自顧藉卒乃潦倒場屋年未及下壽豈造物者不欲成人之美耶然可以愧天下之汲汲者矣有譽儀觀豐偉發口如鴻鐘好讀書不爲訓詁章句之學爲文宗子固詩則取法務觀所著來湖存稿六卷燬于火今存者惟藜炤閣詩二卷而已其孫大椿遊予門故予知爲稔云其祖遺書論曰昔仲長統累避不就時人謂之狂生而馬融貴不貴

之軀羞咫尺之義幡然改圖夫亦可謂不狂已由今觀之
其于狂者何如耶余嘗慨古支人才士奮其所長宜可自
見于世往往以落莫之身老死蓬華此奔悅流競之輩所
以繁興而莫知所底也如有譽者儻亦世所謂狂生者歟

翟藍溪家傳

比部郎翟君藍溪卒于官其友人常熟顧鎮旣憑其棺哭
之重哀其志之不克伸而耿耿者竟以泯也乃撫所知者
爲之傳以貽其家俾其後有所攷焉君諱守燾姓翟氏字
光蘊寧國之涇縣人家桃花潭愛藍山之勝故自號藍溪
大父思成仕辰州別駕遷岳州司馬有聲績父永桂字衛
廷以高才生需次學博年少賁志君常痛焉爲梓其文行

世衛廷歿五年母趙繼卒大母胡覆露之君嘗爲子道髻
鬢時事淚泫泫下也旣舞勺操觚學文輒有理致壬申試
南闈不利尋奉曾大母諱服闋就丙子北闈試以文贄余
相切劘者數月報罷南返益刻志下帷大母懼其羸也且
有鑒于衛廷君曰無復以身殉場屋爲入粟授部主事新
令選人自郎中以下得分部學習遂以戊寅就銓歷事兵
曹而故事在部學者聽入闈君雖眷容冠珮所志不離席
帽謂明秋當作破釜計乃移寓與余隣退食之暇商量舊
學已卯七月已錄名上順天府會刑部廣西司員缺當補
未引見例不停試而言人人殊無能爲君任者竟罷試此
則君生平所最恨事也旣官刑曹曹中多宿學熟掌故者

君傾心下之益明習吏事裁決平允不爲刻深大司寇深器之遇事膠結令治之輒中腴理而退讓不敢先人同事者率交口譽本年秩滿當遷叙遠不及待此則人所爲君恨也君至性天出每念大母輒永夜不寐旣遣人奉迎旦夕且至猶恐高年不任跋涉輾轉憂思以故體益羸偶觸風熱鋼子惡石遂不起及大母至而病已不可爲傷哉君雖不以科目顯而嗜學甚擊喜爲五七言清婉可誦家故饒而自奉若寒素拯急濟困汲汲如不及壬申乙亥間連歲大稔出數千金贍其族族以無困君內行醇謹生平無疾言遽色而降年不永命也夫卒年二十有七配陳氏生一子三女子曰一騰

贊曰温乎其如玉淵乎其如谷其志常在千里而不得一展其驥足位不酬其才年不永其祿殆造物者留其餘以俟夫後之似續

周翁傳

翁字伯甫姓周氏芝塘里人不詳其先所自出翁形體魁碩修八尺餘不持寸鐵以徒手搏人出入千百羣中如無人然翁自謂以手攫搏非能者事嘗拱手鶴立而侮之者倏忽顛躓頭腫鼻豁若有鬼神呵之者未知何術也又嘗謂以力駕人無力者當坐受困乎因力于敵而我無所用其力斯至爾爲人循謹若無能者無賴子欲從之學謝弗通謹厚者質之輒媿媿語然涉其藩籬而已弗能窺其

奧也邑中推大力者爲陳氏子能立水中以隻手迎巨艦當風急浪涌飽帆揚舲如矢直注觸陳手輒止無勇怯皆懾其力疾翁之能也欲得而甘心焉倉卒遇諸隘避之弗及陳遽躡翁致銳前撲翁率繞陳左右盤辟迴舞陳足蹴拳舉盡力揮斥卒不能近久之翁倏攫身空際如疾鷹急隼側攫凡鳥陳驚顧目未承睫翁已舉身撞其胸陳遂不支頽然就傾乃匍匐稽首願稱弟子大將某者號萬人敵聞翁名延致之願與角技翁固遜強之笑曰請以數十穽逾藉地問何用曰恐公仆爾大將怒發一擊不中翁復笑曰公毋再擊再擊仆矣大將者愈怒再擊翁翁大呼曰倒應口伏地然未見翁之舉手也由是延爲上客欲盡其技

顧弗能乃厚贈遣之時錢宗伯受之負海內望卜居紅豆莊客翁翁止其莊者數歲鴻儒俊流過宗伯者翁並識其面目聆其談論晚年率能言之河東君者宗伯之愛姬也才名甚噪宗伯故豪侈重以文章致厚賄投遺無虛日所受金悉貯河東所會宗伯適邑居劇盜數十輩謀劫河東君因致其貲夜圍莊勢張甚顧重畏翁欲先制之翁方浴聞變遽起右足入禪中左未遑也浴所仄門半掩盜數人挺槍入翁攜尺許布捲其槍數槍并落徐約衣結帶持槍奮呼出盜震讐失氣兔脫鼠竄翁尾之連刺數盜中要害宅遼闊盜衆家人伏匿不敢動盜益猖或抉垣毀戶直闖其室凡四五處所叫囂室中索河東急翁舍前所追盜還

擊室中盜室中盜紛藉殺一二人不止後至益衆翁計河東儻被劫雖強力者無能役矣遂排闥負河東決圍出匿之善所還逐盜盜失河東莫能發所藏金肱囊衣數十篋去值翁還爭棄擲道際泗水脫命盜旣去徐呼其家人收弄之迎河東還實不失一物宗伯捐館河東縊翁去錢氏浮沉里間最後乃容先大父所翁時年九十餘矣兩目盡盲猶倔強不扶杖每飯盡升粟飯已輒談其少年事余方八九歲侍大父側備聞之今不能盡憶也翁言初得異僧指授積二十年乃成嘗屬予錄其法爲拳譜一卷後失去又數年卒于家翁無子族子某爲嗣

論曰余幼讀劍仙傳輒驚惑詫異以爲非世上人夫人爲

一事誠致其精果歷久而不懈必有大過人者非異事也翁以手搏號于時顧其仆人人不見其運手之迹神矣哉豈古所稱空空兒之流耶抑二十年之精心果力積于漸者然也不悅學則苟而可爲士而無成其愧于翁也多矣錢宗伯以文章毀譽人顧不一及翁或謂宗伯欲秘其盜劫之事者近是余爲表之無使沒沒焉

陶孺人傳

陶孺人姓徐氏武進人永年縣知縣徐聞濩女江陰縣學生陶洪妻也母莊生二子三女孺人行最後初聞濩昵一妾與莊不相能孺人甫四歲卽宛轉父母側牽衣雪涕有小弁之仁焉已而聞濩攜妾僑寓江陰之蘇墅與其里之

君子陶士銓交士銓有子曰洪髫齡露頭角因以孺人字
之明年聞濩計借上公車門不能以時歸士銓遂迎孺人
于家延女師誨之凡內則女範諸書涉目成誦而女工箴
管靡弗治姑湯太君奇而愛之常念母氏獨居惻惻抱隱
痛衽席間淚痕徧滿既婚執婦道彌謹時洪方補博士弟
子員每篝燈夜讀孺人出疑義相質難或拈題賡唱闈闕
之間如良友焉孺人雖間涉文事而朝夕恆在舅姑所佐
治家政不少弛未嘗以女史自命也年二十七稱未亡人
茹痛襄殯事既畢拒戶自經家人未之知也侍婢桂芳者
聞喉間聲亟炷燈往不得入乃叫呼男婦數人排戶入救
久之得甦猶絕飲食者數日湯太君泣謂之曰縱不念我

二人獨不爲諸雛計耶乃勉進水漿未幾遭危疾醫者罔
知措方夢洪告之曰我父母賴汝養我子女賴汝撫我懇
于神神賜我一刀圭命以救汝及蘇而病若脫于是不敢
死陶故饒于貲既中落舅姑年且衰忽忽不樂孺人盡斥
釵釧清積逋親事耕作操奇贏業遂隆起堂上爲之開顏
舅氏歿奉湯太君益勤且篤先是太君屬疾甚孺人露禱
於天值夜雨衣裳上下俱沾溼猶長跪不起後疾良已太
君以大年考終知其事者以爲純孝所感方父遠宦關中
母莊以前隙不往兩兄俱以貧故役四方孺人迎養于家
與太君如姊妹懽兄汝梅年老無子爲之置媵生一女撫
而嫁之後兄貧病無歸依孺人老焉孺人二子長廷棟邑

諸生次廷梁以國學需次二子早孤露五經四子皆孺人
口授比從塾師受舉子業有作必證之孺人孺人閱之佳
則色喜否卽流涕不食二子惶懼請罪移時始解故皆克
自樹立有聲于時其同里杜進士于盤述其事甚備余撮
其大者著之傳

虞東氏曰杜君爲余言陶孺人擅詩才夫歿後卽焚棄筆
硯獨喜觀涑水通鑑時時爲二子言之至忠孝義烈事常
淚下沾襟嗚咽不能語固其天性過人哉抑所傷感者多
矣孺人終身憂患之中而能終子之事于姑而全父之恩
于母雖古孝義之士何以過之哉

韓氏三節婦傳

節婦陳氏海鹽人太學生韓銓繼配也年二十一歸韓越
四載而銓下世前氏子溶未及數朔望氏教育之俾爲名
諸生視其婚旣抱孫矣溶以中道棄氏撫孤孫泣曰韓氏
兩世惟此而已嫠何敢辭瘁如前志者復二十年耗精疲
形至兩目盡盲而孫又無祿氏旣盲猶躬庀家事事堂上
禮益恭雖目俛俛不辨東西必親奉湯餌無懈色舅姑歿
遺幼女未字氏爲擇佳配資贈甚渥里中士大夫欲以其
節聞于朝以死拒乃止雍正四年卒年七十九子婦方孫
婦徐皆以節著

溶妻方氏前明總兵方勘曾孫女年十七而嫁嫁十一年
而孀旣卒哭乃屬其孤宏樸于姑闔戶自經衆排救得免

時宏樸甫就傅姑陳以哭子喪明家殖寥落氏慨然曰子誠不可以死夜任紡績易甘旨奉姑其父母貧窶無子氏深自節縮以所餘給其用宏樸齒加長凡讀書衣食婚娶之費皆出母氏十指中至兩手成繭不能舉箸積勞故也子既立謂可少休拮据而宏樸且不及報罔極矣姑歿氏年五十有七寢處苦塊日夕不離柩側至小祥疾作乃就寢室又十年而卒

宏樸妻徐氏前明中丞忠烈公某曾孫女也室宏樸者十二年而稱未亡人既視含書中擔二字揭于楹謂太姑年高姑又多疾兩孤藐焉皆孩外無期功之親內無娣姒之援凡仰事俯育皆萃于孱弱未亡之一身蓋未知所以息

肩也宏樸下世者六年而姑以風痺在牀襁氏不解帶者五歷寒暑而姑歿殯葬悉如禮既窆手舉畚撮以封墓曰此先大夫忠烈公家訓也越明年卒年五十一子光裕光德光德以丙辰薦賢書壬戌成進士乃始詮次其三世節孝事入告三節婦皆得祠于鄉

論曰古者間必有史女子之德則有形管書之然未有節孝聚于一家一家而延及三世者當其茹荼飲檠以危根寄衝颺雖智者無能保其終强者無能致其援卒以綿垂絕之緒而振方輿之業三婦之造于韓者大矣哉然且匿跡銷聲甘沉沒而不悔至于身死而後名彰此則士君子之所難而可以媿世之汲汲者矣

陳節婦傳

陳節婦者邑諸生陳某配也姓李氏居邑之尚湖南歸陳五年而夫歿陳故貧氏富家女某嘗恐其不任清苦失堂上歡氏覺之卽斥釵鈿易服御勤苦操作如素習者舅姑樂而安之生一子甫晬而某病篤瀕危謂氏曰家貧親老我死藐孤奚屬氏泣曰天苟不殄君嗣忍死撫孤分也否者以死報君言未旣而某絕時姑氏已下世仲叔繼亡一子在襁褓幼叔諸姑仰食者衆家徒四壁立而舅氏衰齡連失二子旦夕不能自存仲氏婦且無子與氏共撫一孤孤又善病侍舅側者操家政急動見蹙蹙兩人相向泣也卒以婉慤恭順凡事無少拂而孤賴以濟孤旣成矣而氏

以疾卒氏可謂不食其言矣又數年都御史采節孝事入告氏及仲氏婦並以名上得 俞旨其孤某將奉主入祠乞予爲之傳予方爲國子官風勵名教職也乃節所具狀而書其足徵者

馬節婦傳

節婦王氏昭文人年二十二適同里馬晉六閱月而晉下世氏有身且三月矣明年乃生子志山氏闔戶幾居以十指作生計每至夜分一燈熒然藐孤在抱妻其相慙指景誓心涕泗橫集或當風雨交侵薪芻不繼徘徊空庭俯仰無賴至于旱潦失時歲丁大祲無所控告則抱孤兒以啼恂恂慟懷每欲捐生引決俯視遺孤悵然不忍如是者二

十八年而今亦既抱孫矣豈不賢哉初晉之疾革也氏誓不獨生晉不能言徒手指其腹氏感其意故不死既終喪終身不御膏沐有語以家貧子弱難獨立者輒怒形於色父素堅哀其志曲成之云
論曰臣殉君子殉父婦殉夫非不卓也死而無濟或轉傷焉則過已氏欲自引者屢矣脫以一念之決裂下從九泉馬氏之鬼不其餒而卒保其身以濟其孤此昔人之所難而氏能勝之氏之所以可傳也

張烈婦傳

烈婦章氏陝西秦安人年十七歸常熟張相如爲繼妻婉婉得婦道相如倚之相如初聘秦安令魏允升女魏女卒

再娶皆不祿復遊秦安秦安令已前卒依後令某某故與婦父章翁善相如因爲贅壻焉相如無子娶氏舉二子一女越數年歸二子相繼歿尋北遊佐撫益幕中奇疾卒相如從弟四人惟廷梅有子義不得嗣以故相如卒無後烈婦聞訃號慟絕粒六晝夜不死乃斥賣舊廬從廷梅居使人奉夫柩既至將窆俗先以火燎穴烈婦出不意躍火中人衆不得死乃終相葬事日懸相如遺影子室朝夕奠哀至輒哭既免喪收弄懸影距戶經家人覺救之更相守視不得脫時廷梅子在側因使人給廷梅謂此兒日後所生子得嗣我子我當忍死以待諾之色喜家人以爲真不死矣明發廷梅子往問安狀門半掩帷中惟七歲女伏席酣

睡得几上遺書乃大驚跡之河干烈婦死焉烈婦之殉其夫也製絕命詞五首衣裳上下皆密縫連約抱相如遺影置涯側足陷泥尺所對影作稽首狀立水不仆烈婦既歿廷梅爲厚具斂大觀察程公偕其屬具牲牲往河干奠道旁感歎以爲希有盛事蓋烈婦之舍生取義爲聖代之禎祥爲鄉邦之表率而當事之蘊義風生所以鼓勵人心者其用意可思也御史臺歲采節孝事入告烏頭緯楔行耀閭里不俟予之贅也予與相如有夙昔之雅旣悲其遇之窮身之死而無賴也又善其婦之賢而相如爲不歿也賢大夫之能相與有成也是爲傳
論曰史傳所紀捐生殉節之事尙已或出于一時之激烈

忍而爲之後之人不無遺憾焉氏適張者十七年上無姑嫜可奉下無藐孤可守旁無期功可嗣徒痛其夫之歿而斬然衰經之無人窳窳之事之莫或治也忍三年之死以畢乃事然後下從九原遂其初志豈不毫髮無憾哉推是心也以爲臣則純忠以爲子則純孝孔子所謂求仁得仁者非歟

虞東先生文錄卷五終

香長煥
心也之為用誠忠以誠于明誠孝以誠于德誠仁以誠于義誠信以誠于道誠勇以誠于義誠節以誠于義誠廉以誠于義誠潔以誠于義誠忠以誠于義誠信以誠于道誠勇以誠于義誠節以誠于義誠廉以誠于義誠潔以誠于義

虞東先生文錄卷六

墓表 誌銘 行狀 誄 哀辭 祭文

原任太常卿陶公墓表

皇上御極之三年監察御史陶公以直言受 上知晉秩
鴻臚卿天下翹然仰望丰采而公朝論夕思數舉經論相
劇切 天子嘉焉遷通政司右通政未幾遷都察院右僉
都御史明年拜太常卿匝歲之中四遷其官數十年以來
未嘗有也既而以言事罣吏議吏議削籍 制詔不許僮
子鐫級會所降官未即得告歸越五年卒卜食于虞山之
北麓遂妥魄焉公諱正靖字穉衷一字晚聞常熟人高祖
某祖某父元淳康熙戊辰進士高文鉅筆為海內冠性剛

不能事貴人出爲廣東昌化令以勞瘁卒官天下惜之兄
貞一康熙壬辰進士官翰林先公卒公年四十餘由雍正
庚戌進士改庶常未散館卽分校北闈稱得士明年授編
修充一統志纂修官 世廟上賓王大臣議禮需翰林習
掌故者二人推公及江右萬宇兆所議皆施行乾隆改元
充四川鄉試正考官丁巳改御史首疏昌化浮糧事初昌
化俗凋敝賦多田少民弗堪命昌化公甫下車卽列狀申
上官反覆辨論卒不報至是始得 俞旨民困甦焉嘗論
吏道雜而多端丞簿尉率非其才請聽辟置又以學校教
養無法州縣官易置不常援據周禮三德教國子遺意及
漢時久任之法娓娓數千言 上心躋之公爲諸生時讀

書務識其大于易詩書春秋三禮原委條貫故能以經術
匡時爲 上所重蓋蓄積素也爲文汪洋恣肆出入唐宋
諸大家與父昌化公兄編修公各成一家言人擬之眉山
蘇氏云旣歸里門掃跡塵市讀書纂言翛然自得所著文
集若干卷藏于家當公筮議時無弗爲公危者迨議下得
輕調蓋 天子方惜人才開言路徒以公骯髒負氣少裁
抑之行且大用而公遽不及待矣惜哉公以康熙某年月
日生以乾隆某年月日卒年六十有四配錢夫人前卒祔
于阡子三敦安國學生敦敘邑庠生由議敘任石埭縣主
簿敦和戊午順天舉人任福建南平縣知縣調龍溪遷四
川敘永同知女二一適秦安縣知縣魏允升子邑庠生啟

萬一適候選州佐范懷英子極家貧墓石未卽立後數年其門下士顧鎮爲文表之鐫諸墓道俾後世有所考焉

原任侍讀學士兼都察院僉都御史豐潤等處營

田觀察使候補鴻臚寺少卿文安陳君墓誌銘

代北平公

故學士文安陳君旣葬三年其繼配王淑人卒合葬于某原禮也子鳳友等搏地稽顙乞誌其墓余與君同歲舉孝廉于君之本末爲悉不敢辭謹按狀君諱儀字子翽一字一吾先世自山西洪洞小興州遷文安爲文安人曾祖國維由孝廉仕遵義府推官祖怙以蔭補某部郎父良瑛未仕君以康熙庚午舉于鄉乙未成進士改庶吉士授編修

旋丁外艱服闋以原官充省方盛典兼三朝國史館纂修雍正四年奉命隨怡賢親王治畿輔西南水利遷侍講明年遷詹事府右春坊右庶子仍領天津水利又三年遷翰林院侍講學士明年丁內艱卽家起爲豐潤等處水利營田觀察使兼僉都御史學士如故又五年轉侍讀學士乾隆二年調補鴻臚寺少卿未任歸七年享年七十有三方君隨怡卽出津門也桑乾滹沱諸水羨溢文霸津靜諸州縣田廬決壞積潦不消民失業王急延君計君曰天津上應析木古渤海逆河之會百川尾閭南北二運交滙東下當以海河爲經二運爲緯層而溯之桑乾沽白漳衛滹沱諸河之水脈絡關注可次第治也王善之悉以屬君

君先疏下流使四出毋壅徐理其上作長堤束之凡四閱月而工舉君爲諸生時卽以經世爲已任于水利屯田諸大務考鏡得失達其經權相國高安朱公知之深言于王王因請以自隨用其所長故舉事易而成功速也頃之怡邸奏設水利營田司分四局以理其事天津一局則君領之而大城文安堤工屬焉文大地窪下數被水夾堤內外成巨浸波衝浪齧堤欲壞者屢矣君購菰蔣十餘萬束立表下礎捍之目不交睫者十晝夜而堤全堤故民工君以時方被災請于王奏發帑金數萬兩代賑民得安業南運長屯一堤隸靜海縣歲撥霸州文安大城民夫協治民弗堪命君曰文大堤工險民自治不暇能遠助他邑乎且長

屯所治不數十丈而遠調三邑非所以均勞逸也檄天津道除其籍三邑民至今尸祝之時議豐潤玉田間多棄壤鑿渠築圩可使烏鹵生稻梁迺詔君爲營田觀察使君旣受事度其可爲田者爲通溝瀆畜陂澤開關洞引可注可洩又疏引山泉灌高卽惡地俾成沃野期月之內凡得水田四萬二千畝有奇收皆畝一鍾歲得穀四萬二千餘鍾報最入覲 天子嘉焉再出視事復得田二萬幾千畝田旣饒益歲且比登米溢于市糶不得售君疏請採買以實天庾公私稱便會 今上龍飛罷營田君以舊史臣簪筆入侍晉階中大夫贈祖考如其官久之以故人子貧窶甚屬諸門人牛叔易令謀生業羅吏議鑄五級君年屆縣

車遂絕意仕進著書自娛所著有毛詩臆評鄉黨篇私記
學庸私記讀離騷廣前定錄天游等書及蘭雪齋制義行
世元配井淑人早卒繼室王淑人恭儉有家法子三夔友
舉人早歿鳳友王友俱成進士官于朝孫六雲庠生霞裕
恩榮霆俱幼君性純孝母姜淑人邁疾幾殆君跪禱北斗
下百餘日病瘳乃已田園若干頃悉推以讓兄遇 覃恩
以其蔭蔭姪諸弟或不給爲經紀其家完其子女婚嫁無
倦色爲觀察時所部偶被水君立具疏聞或尼之君曰
天子方切已溺憂臣子懷私不顧民命可乎果得請全活
甚衆田或生螻蝻伏土下食根苗聒聒作聲君禱于神一
夕盡死蝗入寶坻界忽集飛鳩數千食之盡古稱咒虎馴

遷徵之君乃信他不勝書書其大者而系之銘曰

遷書河渠固志溝洫叔孫芍陂西門漑鄴 天子曰儀爾
其繼之十載功成見歌于詩昔在京邑魚頭戢戢衣之收
之君爲安集儒林之宗循吏之風著述名山勲猷鼎鐘書
云惟孝君子是儆友于兄弟永爲德教可興可羣式用思
君及其蹉跌觀過知仁相是幽宅迺安體魄我無媿辭勒
此貞石

魚處士虞巖墓誌銘

魚君虞巖既卒其友人買石誌其墓虞東顧鎮爲之辭曰
君諱元傳字虞巖常熟人既析縣爲昭文人明開封守侃
十世孫祖兆鵬父翼世篤孝友君性剛于世少所可獨嗜

書雪抄露纂矻矻不少休尤熟于里中掌故邑志缺軼及
違異者君搜討故籍及名賢碑版訂誤拾遺推舊獻焉凡
寸緘片紙爲鄉先輩所遺者寶護如拱璧至一樹一石並
指識爲某家物其變遷易主曲折原委如數家具余嘗有
所疑輒叩君必娓娓語而今不可得矣君居闔閭中獨坐
卧一小樓若處物外嘗爲予言魚氏居此闔十四世矣言
未旣不覺淚之承眶也君娶倪氏無子弟子尙紘爲嗣居
恆悒悒自以清白吏子孫當有以別異顧不能盡如志因
得心疾遽卒時在乾隆三十三年十一月初四日年六十
有五君病未劇時將營葬其父若母于虞山北麓疑號之
祖營與開封公隴相望有日矣竟不及是月二十八日嗣

子尙紘奉君柩從其祖父母安魄焉君志也系曰 開封
清德昭來許八九十世雲仍耐君其無悲從父祖破山之
山其樂土

范母沈太安人墓誌銘

刑部主事范君家相旣奉母夫人諱服闋來京師持其所
自爲沈太安人狀垂涕向予曰相母葬三年矣而墓未有
銘謹遲君文告而納諸壙弗獲終辭按狀太安人姓沈氏
紹興山陰人袁浦場大使某公配生而明慧八歲通女紅
書算年二十四歸袁浦公公方守部爲選人故太安人歸
于京時內外仰食數十指太安人區處周密無失意者久
之南歸修婦節謹得堂上懽伯氏貧袁浦公衣食之二十

餘年爲婚嫁其子女授以恆產太安人實俛助焉太安人未歸時袁浦公前已置造曰郭生子及週矣太安人撫之厚而郭受女巫教爲厭蠱太安人不知也倏狂易吐實泥首伏罪太安人笑慰之相生數歲太安人授之書每篝燈治紡輒卽令侍讀丙夜不少假時袁浦公積海塘勞題補松江袁浦場大使會部使者巡海上器其才將以海防同知薦忌者以蜚語中之遂被勒先是太安人聞部使言感然曰是禍胎也安有八品散員驟躡六級而人肯容之者乎後果如其言公旣被羈待訊而海塘適圯當逮家屬追理太安人度已事需若干金亟歸鬻產飭相賚以往曰長兒懦恐不任汝毋諉長兒者郭生子也相出對簿盡償所

費帑閱二年而釋未幾復以軍需爲人誣抵而家已破無可爲者袁浦公憂不食太安人曰君勿憂當令相兒以死任之事卒得白相嘗語余彼時脫不解不知作何究竟然相何能爲皆太安人教之也袁浦公捐館舍太安人泣謂相曰汝父壯盛時奮勵功業謂青雲可立致今賫志歿矣汝又泯泯我復何望時相旣廢學爲人主幕務故太安人云爾相聞命祇懼奮志下帷遂以乾隆癸酉魁省試甲戌成進士授今官假歸展父墓拜太安人堂上因爲留養計太安人作色曰君親一也汝以我不能八十九耶乃不敢言越四年以微疾卒時在乾隆丁丑冬十月二日年八十有二子五家舟家相家讓家隆家麟相讓太安人出餘

皆妾出女七孫八曾孫三家相等既以戊寅正月十有二日葬太安人于榆林之阡合袁浦公兆年家子常熟顧鎮乃爲之銘銘曰

越有賢母厥德惟充厥才惟鴻厥聲惟隆中遭迍邐而卒光融惟翼子有成車服以庸眉壽爾崇高朗令終松柏蒼茸鬱乎邱封勒是貞珉昭于女宗

故協辦內閣中書舍人趙君行狀

君姓趙氏諱森初名貴樸字再白一字素存常熟人雍正中析縣爲昭文人才高數奇以協辦內閣中書舍人卒京邸閱數年子同翮乃治葬事將乞銘于邵太史齊燾謁子爲狀趙之先有諱士鵬者宋乾道中守江陰軍紹興南渡

因占籍焉其裔孫實明正統間遷常熟再傳爲廣東參議承謙承謙生吏部侍郎謚文毅用賢前論江陵相奪情拜杖則君六世祖也用賢生祖美祖美生工部郎中士履士履生廷奕廷奕生茂良茂良生君父友倩善醫術爲人已病不責酬貧者更予之藥兩世皆贈奉直大夫內閣中書君生四年讀書日下十數行八歲作韻語九歲作時文咸有思理父奇其才益令博觀縱覽自聖人之書以至百家諸子採摭鈎引河漢無極童幼所儲蓋已比于太倉矣母王亦能詩日課以唐宋五七古律君更自刻苦益瞻于才嘗依朱子綱目作賦二十首又準長卿上林作虞城賦數千言宿老皆不逮而院試輒蹶西林鄂文端公藩江左以

詩古課八郡士擢君童子第一肄業春風亭一時名流麇集爭折輩行願爲交補博士弟子數年浮沉無所遇文端旣枋國移書召君君入都留心經世務凡民生利病國故沿革靡弗推究君嘗以豪傑自命欲爲世間不可少之人故舉意闊遠而好爲其難乙卯秋宦波邵蓼菴少宰主江南試大破排比堆垛之習君乃以詩經魁本房及試禮部復不遇丁巳之役旣定以第一人矣竟以微類罷前後七試皆落名乃益高賣文長安中來乞者肩踵相望新故紙積几案間以千計歲用墨丸數斤有欲羅致門下者啖以好語笑不應嘗大書榜其壁云聖賢豪傑是我做出來的不干命事功名富貴是命生成就的不干我事其明達健

決如此先是文端公以丙辰失君爲憾及戊辰司衡者爲文端長君知者咸爲君幸君投筆起曰試固未必遇果遇則我無以自白矣遂不試故人有爲楚撫者請君掌奏記因入楚明年楚撫奉調去乃佐鎮閩將軍幕淹滯者三年歲甲戌內閣闕撰文舍人君赴試得上選故事內閣需人得于選人中擇望高者入治事因試理閣務君才敏給又習知吏事相國委重焉尋以他累罷君拓落不事生產重廉節而好施與其扶危振急不勝紀而君家固無握粟也當在楚幕時家問來告匱欲有所將不得適有以二千金壽者輒揮去不顧在都多貴游未嘗有所關通而任俠如故以故益窘于財積逋至數千緡乃務賈事通化居冀償

宿負轉爲人所給坐是爲累鬱鬱卒時乾隆二十一年某
月日也年五十所著有塵雪樓草壓線大隱等集蔚子詩
稿若干卷藏于家配周氏賢淑有婦行後君三年卒子男
二長同翼英敏如其父早卒聘何氏以守貞歸趙亦卒次
同嗣庠生有文章能自立今來乞文者也娶國子監助教
徐君顥女余習知君又得君遺事于其家書布以質辭授
同嗣俾請于太史氏以銘君之墓謹狀

先室吳恭人事畧

恭人姓吳氏原籍休寧縣商山人父永鋼公徙居芝塘又
爲昭文人恭人幼歲卽端莊靜一嫻女紅識大義母畢太
君嘗以道學呼之謂當適士人遲久未字年二十四始來

歸母家甚溫飽歸予爲貧家婦勤苦操作如素習者先太
恭人絕愛憐之謂能嗣家法體羸多病乳間有微核太恭
人以爲憂亟延醫療治恭人顧弗介諸懷獨婉轉侍尊嫜
側先意承志纖悉無不當太恭人或以他故少不憚見恭
人輒冰解其得親心如此朝夕潔滌隨奉堂上膳雖饑甚
罔或缺甘旨先府君疑恭人以私財佐養其實橐中固無
金蓋恭人在室時不私蓄一物所奉皆從十指出不給則
斥典嫁時釵釧不余告余亦不盡知余家無擔石儲而性
好留賓恭人爲無米炊未嘗不成賓主歡也夜率女婢紡
織雞再號猶聞軋軋聲余止之輒曰明日薪水未具奈何
遽就寢也嗟乎讀北門詩古人或不免交謫恭人習苦如

是顧處之怡然非賢且明其不作牛衣泣者幾希丁未已
西間余疊遭大故恭人黽勉匡襄俾余粗治喪事無致隕
越太恭人之卒也恭人慟絕仆地逾時始甦蓋太恭人之
恩慈下覆有以感之而恭人之孝事太恭人如所自出九
余所耿耿不忘者也明年余伯兄見背迎嫂致養恭人推
衣讓食終其身如一日待妾媵有加禮慈撫猶子及妾所
生子不啻若己子御奚婢寬未嘗厲聲色余時或有詰責
輒爲緩頰解故其沒也家人長號擗踊如失父母恭人以
孱弱之軀食貧鬻賤苦心志勞筋骨佐余仰事俯育者垂
四十年宜少食其報顧自庚午來京仍以食指繁重累其
支撐丁丑夏杪舊患乳核復發盡力補救得延緩交春不

支遂致潰敗計自去年正月至今歷五百七十餘日支離
萬狀內外醫藥窮百方不效中間甚劇卧床不過半月餘
遽棄我去得年六十有一嗚呼痛哉恭人既下世之二年
恭遇 覃恩 詔贈恭人子二長言遠國子監算學教習
娶宋氏繼娶毛氏仲兄出恭人幼撫爲子次詢聘周氏繼
聘周氏副室邱氏出孫一聞臯恭人幼未讀書而于古今
女箴閨範若符節合其孝奉我親善視我嫂茹苦習勞以
曲成我志有不能覩縷述者用撮其大凡存之譜牒以告
我後人焉

亡友陳立夫哀誄

古之瑰人碩士其志力足以持世其行能足以濟時而流

滯溼淪不得伸其所抱困鬱以死其友哀其志懼其久而滅沒也爲之誄以著其行如范史所列法真夏恭陳實之倫芳聲茂實表石立墓一時頌之後世傳焉余友山陰陳孝廉立夫伉爽好學問爲文豪宕自喜片刻盡數紙投筆輒棄去意弗屑也生平峭直少可獲落不事生產徧游吳楚燕趙秦中爲幕府參軍所受俸累千金嘗奔人危急倒篋相贈或諷之答曰我故素手來今奚損耶君子書無所不窺獨具隻眼盡掃前人支離破碎之說時有過者然亦可謂卓犖大雅之才矣己卯初夏挾其子學良來京師僦居宣南坊出必過余盱衡揚眉指畫天下事洞達曉暢皆可坐言起行顧所遊諸幕不能盡如君意輒揮手去每酒

酣耳熱誦老杜廣廈懼顏二語欷歔累息旋自詫曰錯極錯極蓋不勝其傷痛也君旣不得志于時乃稍治桐雷書有神悟夙解製方以數十品爲人治危疾痼疾投劑輒已而強力健飯者君目之謂面有死法無不中長安貴人爭羅之望望若將免一二素心人及閭閻貧薄子有召必往望君者如慈父母君亦不少厭倦日夜乘柴車僕僕赴人急或觸冒毒熱蒙受風露弗自顧愛坐是病不起君念生平不能見所設施藉此以利濟于時故屈意爲之嘗欲著爲方書挾古人與闔竟不克遂斯則世人之不幸而亦君所恨也謹按蔡氏獨斷安樂治民曰康蘇氏釋義外內貞復曰白君不及治民而貽人以安樂者多矣可不謂康乎

光明磊落終始不渝庶幾乎涅不緇者可不謂白乎君既卒之月有三日孤子學良將扶櫬歸里搏頽哀鳴求所以表白其父者竊附古人刊石製頌之義題其主曰康白先生而繫之誄以抒余哀焉其辭曰
維會稽之山陰兮擅吳越之秀區有偉士之傑出兮伊余心之所輸汲汲乎身之不謀而求濟人兮庸詎解于世俗之怪迂懷抱利器蹇不得其所施兮獨俯仰四顧而累歎衆罔罔其相逐兮徒震讐其緒餘或見表而不見裏兮夫孰定君之行趨旣康濟之有懷兮亮貞白之不渝跪陳詞而累行兮乃不禁夫雪涕之漣如眇歸旒之翩翩魂悲離兮其別余于郊之衢余方抱子荆之悲惋魂其知兮毋亦

然歎其愁余

仲際斯哀辭

夫何天心之降割兮忍蘭茝而廢之藹羣賢之鼎鼎兮弱一个而披之惟仲氏之仲君兮羗秀羸而鏗奇余不識君之面兮而獨愛君之文詞非世俗之所服兮法前修之表儀信姱好以練要兮胡不使之登閭風而逶迤日月忽其不淹兮乃遽迫夫崦嵫渺閭闔其難倚兮莫皦皦之不可爲也芳霏霏其未沫兮將溢醴泉而蒸靈芝君有後其弗棄基兮諒修短其奚悲余獨感此姱節兮紛沈瀾而涕垂

公祭邵味閒先生文

惟公朗耀夙彰孝友天植少而孤露動應規格長益振奇

敦厲學殖問字雲亭執經通德峩峩義門躡其前席四庫
之藏二酉之籍靡不周流是究是索揚其波瀾傾其瀝液
以其餘閒精于結畫屋漏古釵斑斕秘色公之家庭祇順
肅清上和下睦後弟前兄內無嘻嗃外不囂爭式穀有常
義方嚴明必慎唯諾毋苟翔行夜勤燭跋晨課雞鳴詩書
播馥禮樂舒英縣延世澤昭晰家聲用啟祥源式懋慶緒
邊未封胡醜醜酪乳星聚珠聯鴻軒鳳舉五桂交柯七科
濯濯翹楚幼子童孫雍容庠序惟公篤祐洽其譽處公之
盛年茂于文術能士秀民執牖請謁盱衡揚眉踔厲駿發
日暮遭逢穎脫電拔齊瑟不收楚璞再別嗜好旣違壯志

斯鬱漠漠青雲蒼蒼白髮孰能不嗟公獨曠達源長必流
積厚乃發諸賢奮颺惟公貽厥公之晚年逍遙味閒黃庭
一卷莊子七篇焚香卻掃品茶煮泉揮毫落紙如雲如烟
開徑揖客惟耆惟賢追權月下脫帽風前虞山峩峩湖水
漫漫籃輿舴艋時亦盤桓宜哉遐壽長駐華顏天不憖遺
儀型替焉嗚呼哀哉某等謬附郎君同聯蘭譜久隔風裁
夙傳儀矩往歲九秋稀齡引數祝嘏稱觴紛綸班簿星紀
未周遽成今古追懷疇曩能不酸楚公有後人聯翩接武
康寧考終夫復何苦嗟理則然情胡不撫抽哀馳辭往侑
薄醕

祭翟藍溪比部文

嗚呼藍溪而竟至斯耶渾金璞玉之品而糜爛若腐草騰
雲蒸雷之氣而流散若春澌耶豈屈伸修短之數制于冥
漠者不易抑造物者錯綜顛倒而理固不可知耶夫亦可
怪也已夫亦可悲也已初君之及余門也在丙子之春其
習久而知之深也歷戊寅己卯而加親每開編而索解或
衡文而索真苟有疑而必質蓋無細而不陳旣歷事兵曹
劬于職業而退食之暇猶呿唔兀首而不恤勤辛謂將冀
來秋之一當以釋是愆負而此區區者實先子志事之所
存胡事勢之乖隔卒沮格而不伸憶君言之在耳不覺慟
我臆而傷神泊乎試事將撤白雲是司不康厥居乃去余
而東之雖道里之非遙亦蹤跡之少違然月必至再至必

淹遲有經旬之弗覲輒命駕而往窺惟午月之中浣余探
君于清華偶領上之墳起非潛積之厲瘕意是風熱所搏
可勿藥有喜而不謂病勢之轉加亟挾醫而往視猶道謀
之騰沙乃終錮于惡石遂興歎于龍蛇嗚呼哀哉君之爲
人如春斯溫君之服官如海斯寬孝親信友親賢去醜退
讓擗節虛懷善受余無夸詞字于衆口至于文章彌鬱而
昌君實不能無少望于余終當存之以慰君垂歿之所望
爰摘詞以陳痛乃聲咽而不揚聊以敘朋舊之私述永訣
之愴靈其有聞來舉子觴嗚呼哀哉尙饗

虞東先生文錄卷六終

虞東先生文錄卷七

古今體詩

雜言

貧賤雖難工君子堅道心附驥羞咫尺干齊動商音惜哉
賢豪者而使壯氣沉考槃矢勿諛彼樂何其深
鳳凰雖五色所重高岡鳴其鳴曰歸昌不雜凡鳥聲伶倫
審音者採之入咸英嗚呼反舌鳥飲啄謀其生

貧女吟

憶妾年尚少薄髮掩秋眉素質謝鉛粉自愛天然姿父母
惜不字忽忽青春時青春復有幾坐起餘齋咨誰家合歡
被繫妾手中絲此絲未出箔恐有愁女窺如何上絡車譜

出聲聲悲一悲妾命蹇一悲年歲移媒妁或來言詎乏王
謝兒妾家固貧者有願賃春隨

東昌 弔鐵鉉也

高飛燕子入東昌歷亂旌旗黯夕陽天子賜書優叔父將
軍擁盾哭先皇韓原已誤逃秦伯梁室都悲失彥章千載
仲連臺畔月照人肝膽白如霜

贈馬孝廉力畚

納納大宇宙萬物苦雷同齷齪難指稱誰爲出羣雄扶風
起後賢排拓萬古胸搖筆闕虓虎驚氣矯游龍瑤篴秘不
出鬱勃作雨風大地一聲吼入耳三日聾百家總雜碎唧
唧鳴秋蛩如何五十餘浪跡如飄蓬我從維揚來煙波淼

無窮固疑有異人出此空明中側聞東序上虎紐懸霜鐘
焉有清廟器而使衡門終材大莫小斷庶幾待良工

癸亥元旦

無端將去轍此日尙俄延自笑容中客那堪年復年辛盤
聊徇俗綠酒獨開編鬢髮添新白迴思一惘然

送王梅冶先生歸里

沙塞春回積雪融穩騎款段騁歸風四年清宦嶺之表萬
里賜環關以東鄉夢已生荒徑菊臣心還戀紫宸楓烟簑
好下婁江釣何似成都玉局翁

寄孫大中伯十二韻

魚雁來書杳荆榛寄跡偏秋風歸路阻春雨客裳漸瘳嬾

非中散迂愚亦米顛
沓含羞觸熱便靜樂
調絃失馬懲前事
呼牛任世賢
醉餘還白墮
寒盡尙青氈
拙守徒三笑
饑驅且一飽
病多勤煮藥
吟苦緩裁箋
俎豆垂時節
松楸悵墓田
愁侵將夜月
夢斷欲霜天
舊好心還戀
家人眼正穿
田園知己落
絨札一蕭然

寄高二寒庭二十六韻

憶當辛酉歲佳節
度重陽白酒開
新甕黃花遞
晚香清言謝
塵空快賞盛
雕章自後多
離索於今尙
感傷嗟君既遭
擯哀我游罹
殃弱息隨衰草
連枝委肅霜
愁雲翻別夢
苦雨滴離腸
硯破猶濡墨
囊空漫做裝
征車行躑躅
襪被走蒼黃
道古風寒厲
天高白日荒
青山橫淡漠
遠樹出微茫

世路千迴轉君門萬里長
顛愚仍似昔干謁竟何嘗
庭訓還堪溯師箴詎輒忘
濫竽終溺聽按劍遂銷光
濩落疑秦贅飄零類楚狂
覆蕉空逐逐摘埴獨悵悵
客子原多畏屏軀祇自防
本同科上槁頻作夜鳴螿
入世終疎放安心任翁張
長饑嗟斷梗渺慮屬惟桑
圻岸風波惡漂沙水勢猖
庚呼聞麥麴野哭沸蝸蟻
齟齬辰勤安集轄軒費
推量不才吾已矣遠到子
方將驛使傳梅信春江引
領望

柳大絜夫有詩見別答之

甘脆徒臍腸澹泊轉餘味
樸見靜者性巧乃斲真氣
斯文良亦然身賤則辭費
平生所置力箴此父師誨
所以歷紛紜懍懍矢兢畏
有客修古容人與文俱貴
畚經旣菑播猶

史亦組緯暇力穿圭旨天扉闢萬彙清虛沁心脾滌筆脫
時製孤詣泣真宰芻微乃不棄時或涉舊聞酒兵討宿滯
雕辨戰雨風側出詎崖異時或邀聯吟結言抒所志造語
爭敲推強韻再接厲茶力不自知抽思努相際聚散曷有
常萍蓬本無繫鴻鵠遠爵羅雲天恣高戾臨別矢忠告貽
詩著深愛後晤約無覩萬古陳此義

奉呈見復師十六韻

我師棲澹泊弟子隔塵烟宿疾蒸新暑羈愁綯舊編典型
雲樹遠鄉國夢魂連入世終無術禔躬正有愆讀書殊少
得厲志尙能堅性懶偏藏拙圭方那削圓素衣還未化樗
散或期全已分乖時好宜當受俗憐往時親馬帳深意脫

魚筌樹骨羞骯髒徵文戒悅妍更無奇字問只有辦香傳
雕朽資良匠扶蓬賴衆賢豈知雲散後長恨雨絲前骨肉
多荒草金蘭半墓田饑驅無處所擿埴益茫然何日將歸
棹從容杖履邊

再寄高二寒庭

日日狂風雨正淫蕭條門巷等長林五陵花事三春夢一
夕勞愁萬古心世路飽經餘我在交情徧歷更誰深故人
近狀知何事爲報吟鬚雪漸侵

苦熱行

火龍行天白石赤焦陵沸海湔沙石上無纖雲下無風坐
使萬類成枯腊舊聞北地勝江鄉入夏無蚊入夜涼所云

今乃異於古深夜酷熱如亭午烘房灼席汗不收欲避屏
營無處所何能學得王子都十爐熾火同冰壺冰丸雪散
不可得金墟福地人間無車馬長安陌經旬絕行跡良朋
咫尺不敢視風傳言語相驚惑吁嗟焚如卽死如道旁噉
者殆蝸蛆一日早出晚不歸妻兒哭向城之隅城隅哭聲
何煩冤九重宵旰心體元議獄緩死渙大號頌冰掩骼
流洪恩皇天昭格降靈祉一夕火龍伏罪死萬類焦枯慶
更生至誠贊化良有以小臣歌此苦熱行長願仁風扇閭
里

自題振衣千仞岡圖

處卑見高者謂高不可跂高者詎自知到此直平地振衣

雲霞間凌風恣遐睎本在人境中乃曰太危厲納納宇宙
寬高卑總一致人生貴獨立平地亦無際

王將軍墓

梁唐之間天地圯脫棄舊主如脫屣懷璽紆難推廟謨執
政如奴將如婢此時獨有王將軍裹瘡血戰無完體鴉兒
蕩蕩東北來爭先勸進誰知恥豹尙有皮人奈何將軍宜
有絕纓死天下躋唐不躋梁北面事之何論此汶水湯湯
流墓旁將軍肝膽清如水

曉發荏平卻寄高二寒庭

喔喔雞聲度曉鐘迷離客夢亂雲中依人馬首三分月逐
我車塵一路風猶有囊詩酬古驛更無厨酒賁新豐故人

欲問途間况柳漲春寒雪未融

寄为

秋歸纔與拂征塵雪落梅開又旅人數口累君支病骨一
囊送我伴吟身深閨月落初回夢遠道霜濃正問津自惜
去來當不遠錦機莫遣寄書頻

三君詠 有序

饑驅南北蓬轉十年竹林舊徑所傷歎多矣而尤戚
戚者三人焉作三君詠

許君蘊藉人禔躬潔圭璧克儉不覺貧攜謙乃知益道腴
既含咀書味况流溢論交三十年相視成莫逆嗚呼歲在
巳賢者身茲阨傳君易箒言至今汗巾幘君易箒時猶
極口稱余

右許巽之無過

范君名家子振志希前人庶幾九萬里健翮摩高口此意
竟蕭條役車休柴門微疴痼惡石駿骨埋荒榛遂令湖海
氣散作空中雲噉然哭我友淒風黯夕曛

右范樂賓燕

朱君抱逸才曠絕與俗殊平原萬仞心抒君寸管奇嗟余
馬齒長自愧形神非謂君英妙年不日金閨趨美人遽黃
土斯理良可疑遺琴再三撫歔歔重歔歔

右朱鄧雲林

書贈僉事倪公傳後公諱國珍字懋功成都人粵
西義寧令奉檄撫叛苗遇害
李陵去漢生常山為唐死生者有死心死乃得生理利害

與是非違違不相倚當其赴火湯血肉成菹醢朝廷卹孤
忠大義風薄海遂使沙場骨日星迸精彩不見義寧令芳
名比香茝嗟彼全軀者捫心有餘恥

送張繡園令渠縣

往歲秋深君送我今秋我復送君行我來郢路八千里君

去巴西一萬程修尾銅魚飛潑刺若渠有銅魚州水底有

潑刺科頭猿女舞縱橫渠縣渝水間驟車已駕重攜手日

暮桑乾悵遠情

送黃直齋令高苑

上苑花飛三月春馬蹄得得動征塵廿年名士今爲吏一
寸愁腸遠送君定使鳴琴先化俗莫言捧檄只娛親萊蕪

舊傳平生讀直欲相要到古人

夢中得白髮青山二語醒足成之

夢魂何感慨年歲坐蹉跎白髮故交盡青山落葉多淨身
真大患閱世亦流波生理原無死捫心疚若何

古意別歸愚宮詹敬亭光祿二首

灼灼枝上花隨風落如雨殘紅委路塵踏籍不相顧榮落
會適然於花亦何與獨有惜花人徘徊歎空樹

盈盈閨中女自愛淡素妝刺繡恥倚門欲字終旁皇旁皇
竟何爲未忍改厥常嗚呼憔悴有復稱姬姜

重過南園二絕句

舊來一曲樊川路去後重過已十年憔悴醉翁門下士道

山亭北獨潛然

傷蔘庵中丞

無端舊雨隨風散只有王郎斫地歌

謂王三悅巖

往事不堪重

記取方干墓上白雲多

謂朱鄒雲秀才

盛青嶼將南歸出巖東草堂圖索詩用謝宣城酬

王晉安韻即送其行

夙齡慕巖谷忽忽髮已晞睠彼東林鳥寥廓亦倦飛梁園盛賓席穆醴隆經闕豈如巖東幽吟咏相攀依一昔別故人理棹將南歸歸來草堂上整襟猶素衣

荻港驛登鳳凰山

洪流紆盤西到此青天突插鳳凰翅

山石片片如飛翅

砒兀拗怒

勢欲飛磴危薛古滑屐齒橫行側足恣扳窳僂身屈折窮

其巔碧霄隱玉渺何處

碧霄峯林渡禪師卓錫處隱玉山浮邱公所棲

一氣但見

雲烟連日落倒影橫江赤虛空粉碎生金碧不盡江聲動

地來迴波剔透玲瓏石

華陽阻雪

漠漠重陰黯四天漫空瑟瑟漲寒烟梅花魂斷含山月桑

落人停渡口

桑落洲在九江口

愁入酒波濃到底雪開江勢闊

無邊灘頭若箇披裘釣歲晏辭家笑仲宣

九江得房師景思張先生凶問時長君令德化先

生方就養

斐然小子不知栽萬里寒江載酒來風坐未經通束脯雪門已悵沒蒿萊幾行雁足傳書切一夕猿聲叫月哀盼望

靈旂渺雲際溽陽灑淚重徘徊

欲登赤壁不果

臨臯木葉盡赭石削寒烟未見孤飛鶴空移半夜船江山
原自勝風月竟無緣世事渾如此重來未卜年

不寐

栖栖歲暮客渺渺夜深船霧氣重霾月江聲直上天清猿
兼落木獨雁自前川魂斷湘南北中宵未穩眠

岳陽樓

萬里烟波結洞庭倚城樓勢接青冥經春湖水三分漲入
眼君山一點青日月盪胸浮世界兩風飄瑟動湘靈幾時
約得任公子醉把漁竿釣晚汀

瀟湘圖歌爲柳絮夫作

錢塘才者柳絮夫昨從南楚來京都浮湘涉沅走萬里示
我尺幅瀟湘圖圖間檣櫓勢欲動舟中有人若可呼疑是
杜陵老江上望蒼梧或是湛方生扁舟泛南湖風流畧似
永州舊司馬來與景差宋玉相陪趨此人此景道不出况
我淹病筆久蕪貯之篋底行半載近亦南楚浮長桴迷離
烟雨渺難盡恍忽已見圖中吾梅花方落笛聲起明月空
江天有無

嶽麓書院

南軒先生天下才慷慨請戰何雄哉一朝賊臣主和議萬
里父子投荒萊孝皇臨御起遐謫宣室從容前帝席先生

觀變妙達時養威伺釁陳訐策我謀不用適歸兮來闕荆
南嶺上扉屈騷宋賦那足道鄒書魯論扶漚微卽今遺構
連雲開猶說當年舊講臺我來瞻拜恰三月習習春風掃
綠苔

思溪阻雨

餘暑未消渾似夏一篷疎雨卽清秋林間香洗離離橘郭
外聲啼滑滑鳩雲溼重欹青箬笠烟深橫棹木蘭舟衣單
自去搜行篋裋褐猶堪禦石尤

鈴山

鈴山俯東郭仰望青峩橫江落彩虹上跨白玉橋萬年橋在鈴山下秀江上築白石爲之長數十丈分宜當國所建楓影生夕霞松聲奏靈瑛峩

峩香葉冠千古蒙譏嘲

黃沙港

插花山下黃沙港洞口桃源可便同蟠曲幾多垂釣石蕭
疎絕少問津翁一篷響滴棕栢雨兩岸香生橘柚風日暮
烟波迷客艇蘆花料理宿征鴻

白雲阡

弔方干也

衰草斜陽九月天冷風寒露白雲阡高才濩落同千古猶
有襄陽孟浩然
誰憐駿骨市千金一夕臚傳下玉音科目若教泉路重荒
原多少未灰心

太學瑞槐歌

鴻鈞氤氳厚蓄積應時而發爲祥徵聖賢臭味眷草木禹
柏孔檜槁復青芄芄者樸菁菁莪文明之象於斯憑太學
堂高肅詩禮有槐西庇枯鬚髯腹空皮裂脫枝榦誰歟植
者元許衡五百年物比老宿八千歲春逢長庚 慈寧九
如松柏茂作人壽考髦士登地靈首善澤宮始雨露汪濊
神祇鷹槐花復黃槐葉綠五雲聚頂陰層層本根盤坳屹
肩屬柯枝屈曲披欒楹樓桑出牆狀車蓋巨櫟蔽社浮山
棚何如斯槐出靈異光華日月豐滋萌出來皇穹妙感會
孝德登顯淑氣迎畧於端倪見真契元精回復大化興
槐身輪囷百億齡槐心有知同 莢萸羣生嗔嗔世曼壽山
川林麓麻符呈

張大繡園以計典入都行赴合州新任枉過荒齋
流連竟日送以長律二首兼柬胡近光同年

離合無端俄七年詎能相見不流連開除歲月真成夢銷
算文章值幾錢久去未忘臨別語重來還讀贈行篇

赴宕渠君猶
日熟其詞

與君檢點平生業一榻清寒有舊瓊

余前
送君

坐深不覺日西暝門外將車許暫停世事幾堪回首看勳
名合在下風聽長安依舊留詩客蜀道從新動使星此去
好逢胡伯子道余閒訊重丁寗

舒衣岳同年奉發江南辦賑作五言四章送之

皇心軫東南饑溺切宵旰上遊溢江淮海水亦激悍今年
夏秋間淫淫雨不斷 天子曰吁哉原陞或蕪漫足食本

計先安集資治翰舒君富才歆賢聲徹霄漢應
民中澤鳩鴻雁上慰天心憂下以活窮閭
詔撫我

令長雖親民詎能脫胥吏顧彼狐鼠紛擣虔蠹官治磨牙
吮膏血橫噬盡骨裁卽今賑發時厄漏不可闕肥瘠互回
易戶籍恣詭寄減縮旣厲民冒濫亦滋弊所賴明府君摘
伏窮魑魅庶幾仁風揚人人飽天食

君仕昔三楚所在號清淳美錦足良製吟謳動江津吳楚
一體觀其間或差分楚中富魚米吳中艱桂薪奢儉各成
俗苦樂會有因救奢莫若儉古訓良可循所賴賢長官誨
爾時周諄庶幾風俗移長此無饑貧

與君其蘭譜忽忽垂廿年先後各蹤跡語往亦款然今君

適吳會繫我舊阡陌儲黻楊謙古君子贈行賦長篇愧余

詞鄙拙聊以悃悃宣送君桑乾河秋風動夕烟哀哀衆口

啓望君若歲焉明年 翠華泣 璽書獎勞賢

丙子春暮密齋廷尉招同宗讌集得二十四韻

吾宗本已姓漢初居會稽遞傳至三國門楣星漢齊晉宋
梁陳隋訖唐無播遺後或散四方分巢各寄棲遠陲旣契
闊邇居亦違離蹤跡曠不謀恩誼靡由滋廣陌多行人相
逢識是誰豈知萬派流混混來天池藹藹廷尉君起家籍
金閨先世本吳會遊宦入蜀西遠念宗族睽招呼集周姬
肆筵酌春醞坐以毛髮差二子出拜客濟濟動光儀少長
禮秩秩言笑情怡怡萬里倏具邇踈迓成春私飲德方覺

飽授簡徵新詩柯亭富文術放筆縱橫馳端卿體妍妙揚
英攄清辭伊余腹背毳發聲羞庸微詎敢託餘絢聊以胸
膈披良辰迪嘉會親黨相因依主人篤情好令我深長思
異地尚如此况乃連根枝願言常聚首歡樂及清時

古道獨行圖為張繡園作

斯人共藝秉古道安得獨塵利汨其真惘惘恣征逐所以
君子徒中行矢獨復出入由禮門義路走規軸誰能競周
容背繩以追曲柄鑿理不謀毋乃迂時俗豈知坦蕩途利
往無棧觸緬懷古之人温恭保純篤惟道不崖異晷朗開
晴旭我友高素風伉爽絕偃伏示我獨行圖願以古人續
能獨斯能羣展此千里足

送何侍讀敘軒假歸粵西省墓

雨絲初滌暑衣天仙吏陳情省墓田同譜幾人稱莫逆朋
樽終日話流連十圍芳桂家山樹敘軒自述家園桂大數圍一幅輕蒲
秋水船懸識歸來拜先壠鬱葱猶帶翠微煙

折柳歌傳尊酒餘秋江遠道去容與歸途半我舊遊地行
篋多君新著書天外白鷗芳草渡山中黃葉故人居鄉關
暫憩非淹久早赴承明奉玉除

次和桑弢甫贈章并柬馬力畚

太白溪名竹香山社有蓮馬融推舊學桑戶實通賢友教
開嵩秀論交溯洛川簪朋異地盍蘭臭遠天傳力畚令河南君掌嵩
秀書院既定交學性冰凝海詩懷雪在絃漸遠隨斂翮望
力畚郵書報余

戶謝排肩御李常深願攀嵇獨少緣况兼人事阻復以旅

遊遷

君徧尋五嶽遊跡不定

自顧慚迂拙惟知守默元一飛終笑鸞

百足更輸虻瓠落吾衰甚痲痲君嗜偏會從恆嶽返將向

海門旋蓬巷高軒過萍踪短袂聯丈人折行輩

余與君壻盧紹弓太

史同歲舉孝廉君為丈人行稚子入詩篇

贈詩警及豚兒貌

古神迢爾情深思

淡然風流追漢向辭賦陋王宣痲痲烟霞裏雲山杖履邊

冥鴻成獨往碧宇恣孤鶩古道相要約今情盡脫捐蒼葭

隔杳渺秋水欲尋沿遠辱瑤華贈深勞夢想牽扶風有同

好願共討陳編

寒山書閣

澹絕人事違浮閣倚危磴朝雲凍不飛山色寒逾遠

絲琴書松廳滿清聽

夏山雲霽

陰浦收夜雷前山起朝色雲歸溼猶滯嵐淨翠欲滴開閣
延清颺不覺煩暑釋

虞東先生文錄卷七終

虞東先生文錄卷八

古今體詩

擬古二首

抱甕歸舊疆竄跡東海濱伊洛深且迴欲渡無舸輪昔與
二三子形忘義以惇文章盛京國編紵時復親兗豫千里
違鬱紆傷我神君子交有道不在終日羣翰墨豈勲績憂
此百歲身廣廈需衆材勉旃任重勞

右陳思王贈友

吏俗不可爲閒身寄物外微雨洗山月松風帶夕籟掃席
自焚香坐起了無碍白雲生客衣俯世若蟬蛻

右韋左司寺居

伏生授經圖

漢代求遺經使車紛旁皇伏生九十不赴召壁藏舊典多
流亡詔使掌故口受之年老齒缺難具詳女郎齊語不盡
曉錯也以意通其章頗怪歐張親及門胡不令之檢校同
權量魯其壞宅出蝌蚪安國使之都尉守何爲白虎論異
同無人上自巫蠱後側聞百兩篇云自東萊傳伏生老去
鼃錯死縱有後賢詎辨此安知梅史所上書不是東萊棄
故紙天寶編摹詔史臣塗改點竄滋紛綸古文順易今難
讀此疑千載誰能伸卽今披圖兩默塞欲問不得長太息
晉唐以後書更繁不如蠹魚終古守殘墨

燕歌行

朔風吹沙白日黃家住遼水當秋防烏鳶啄人赤狐叫六
角八部同跳梁漢家徵兵飛羽檄涿邪窮另陰山黑夜戰
歸來血洗刀將軍按劍猶作色自從結髮挽強弓頰首麾
下如奴傭身經九死出一生燕然獨勒將軍功功成取印
大於斗十萬貔貅牛馬走當時李廣侯不封論才豈在嫖
姚後君不見沙場古骨埋荒榛千年碧血成青燐飛而食
肉是誰者畫角一聲愁塞雲

送張石帆還京口

怕聽驪駒唱鄉心我最多送君須盡醉勞者正思歌鐵甕
城邊權金山寺裡過中冷泉獨品相憶定如何

題杜文貞公像

唐室禍方鎮先生搔首吟崎嶇羣盜路憂患一心託興
江湖迴言哀故舊深卽看遺像在滿髻雪霜侵

盤山

嵯峨千仞薊門山謝屐當年迴未攀百道泉光翻海窟三
盤地勢接天關尋雲欲問高人隱扶杖曾看 御輦還指
黠衛公臨眺處劍臺零落薜花斑

蒿燈行

有序

京師俗於七月十五夜採蒿全本以品香綴而蒸之
名曰蒿燈豈招魂蒿里之意歟作商聲以歌之

忽晴忽雨天半昏家家剪紙招亡魂小兒伐蒿作供養懸
諸妙香虛空焚萬數丹鳥簇珠樹歷歷又似羅星辰仗此
願力破諸暗烟氣杳靄成香雲此時胡僧踞高座長筵爲
設孟蘭盆新鬼啾啾故鬼哭胡僧喃喃奏胡曲迴風吹燈
燈影披化作青燐散林麓

淨業寺

淨業湖邊淨業寺藕花環作十分香雲間山色明秋水天
半鐘聲吼夕陽魚監舊依金闕迥鰕亭遙帶玉河長老僧
更有閒中樂數畝新杭欲上場

曹復園黃山雲海幢子

我聞天都拔地七百仞平視四郭如列郡罅烟絮縷冒松
起奔湧卻會窮日瞬雲梯滅沒不可窺瀾漫匝匝縣四垂
是雲是海渺難狀頃刻萬變誰施爲率山爲首黔爲脊三

十六峯轟穹碧前海後海環海門恂恂烟波勢何極海中樓市驚東坡毋乃蜃氣侵陂陀當逢老人笑破口子耳食耳如山何自言昔在此山居皮蓬作室籃作輿霞城乳竇恣搜討翠微松谷遊空虛此中元覽說不逮駟役意匠窮幽怪側釐十丈潑墨成揮灑三千大千界堆皺感摺石勢攢卻迎凌亂松風寒盪胸撲面雲氣合龍嘘蛟吐雨意漫此老八十倔強在精神抖擻筆墨外蘊結真宰通仙靈一片白雲無住礙

書生戎馬圖爲心芝林明府尊人作

黃沙捲地白日青吳回跳舞妖風腥羅施夜郎血漉漉五溪流毒瀾南溟益陽令尹萬人傑腰插吳鉤身衣鐵夜馳

赭白謁軍門此行誓使機槍滅軍門倚公披赤心飛芻蕘粟無難任揚旌督戰親援桴花角繡面皆俘擒從此天南烽火熄露布焱騰上公績圖係李顯所畫繪作圖寒光鎖甲猶邊色憶公射策對賢良洪鐘振響摩闔閭一朝奉檄盪兇逆頓使襁被生成光方今聲教溢函夏萬里窮荒歸宇下仲君趾美播循聲賣刀買犢休戎馬

歲暮過夕照寺值雪與嵩旨上人

逼歲吏事閒散衙徂東郊東郊遠公在有約成久要詩逋積未償安能謝嘲調索紙聊一陳不覺風雪驕窗前淅瀝聲與我爭推敲

推敲未云安雪勢俄盈尺掃雪試烹茶茶熟詩正得三者

會適逢一片成虛白公聞笑听然詎復區儒釋匆匆別公
去暮山淡寒碧

馮憲劉烈婦胡氏值張獻忠之亂從邑居避之南
塘中途遇賊乃以二歲孤授僕奔竄奮身罵賊
死焉其曾孫孝廉有洪手錄事畧乞詩

血染沙堤白石黃碎身完節事堂堂蒼涼幾曲南塘路楓
葉蘆花夜夜霜
袴中兒已屬程嬰垂死猶聞罵賊聲鼎鼎鬚眉好男子怪
他老死一毛輕

促織鳴

唧唧復唧唧秋機催夜織夜織慎勿停淒響難爲聽細若

幽怨擬簫管倏乃猛起高玲玎伊何聲促織鳴愁人淚落
嬾婦憎頑童橫索夜炷燈嗟爾蛩莫匆匆蒼苔秀野藏爾
躬胡爲弄翼吟秋風吟秋風入網籠

琉球刀歌爲王夢樓編修作

陰森白日晝掩雲寒鋌撼撼生青磷主人酒酣拔刀舞斑
血赧駭腥風聞爲言此刀出東澥黃頭之長親脫解埋藏
井底歷歲年化作長虹落光彩我聞在昔古軒皇採金煉
火成精剛鉅鹿一揮盪寇逆終古日月光垂裳卽今四海
平若砥萬里要荒入邊鄙挹婁之弓肅慎矢上之職方包
圍視君有寶刀將曷使昔從海上汗漫迴饑蛟怒立迎及
摧翻身向月斫高樹應手落之何恢恢人世鉛刀徒爾爲

玉蝮橋觀荷

太液環西苑紅蕖出翠叢華光帶初日波影落長虹香霧
迷濛裏雕闌隱現中金莖承露渥地已接天宮

秋草

高空漠漠淡秋光隴畔離離怯早霜漸有朔風生塞外更
無幽夢到池塘吟蛩入夜寒愁結舞蝶當年別憾長獨愛
平陵張仲蔚蓬蒿滿徑嘯斜陽

芙蓉莊紅豆樹歌

田園就蕪三徑荒秋風破我芙蓉莊莊中紅豆久枯絕村
人猶記花時節花時至今七十年我生已晚空流傳一宵
纖芽發故處孫枝勃宰兩三樹此樹移來自海南曲江族

諱耿光

手植世澤賈錢家尚書我自出庾信曾居宋玉宅紅
豆花開及壽時尚書誇誕賦新詩我嘗讀詩感胸臆鳩占

中間僅一息今得神明復舊觀古根不蝕精神完昔在我

祖辭徵辟封邱老檜撐穹碧再生再死劫不灰忠義由來

性所植始遷祖細二公元初被徵不就手植後來此樹復

類之俯仰徘徊見先澤告我雲仍好護持莫尋斤斧相戕

賊吁嗟乎莫尋斤斧相戕賊

次和謙山留別詩

鄉關獨自抱琴歸草色盪瑤柳絮飛擬向烟波爲釣客穩
攜舴艋上漁磯遊雲出岫原無定倦鳥窺巢得所依聞說
北堂護正茂好將寸草答春暉

廿載論交筮盍簪出山先後集春林久要共結江湖興小
別翻驚風雨心世事茫茫滄海闊前途杳杳白雲深海鷗
雲鶴疇馴得竹徑蕭森野色沉

輓鄆城胡近光明府

飄蓬踪跡昔年同驚聽虞歌出海東未得素車臨舊雨可
憐白髮泣淒風民間名子原多後縣社圖形勝壽終君年四十
餘無子而多惠政民間禱祀之誰擅中郎銘墓筆應知范甑并塵空

密齋廷尉將歸華陽余亦以倦遊欲息浮寓其邸
數晨夕者月凡再更舟人告期巖裝俶發判別
之餘情不能任既贈之以文而復綴以詩庶幾
他日請念云爾

蒸暑方辭夏新涼動遠天我行何滯也余擬九月君去已假歸江南
翩然夜雨離亭酒秋風歸客船華陽有故舊談笑及今年
贈處無多語殷勤訂後期仲宣依乍失安石起無遲淡漠
吳天永巉巖蜀嶺奇重來勞問訊應有尺書貽

效古二首別諸同年

十月既陽止有鳥懷故林高飛洵云樂倦翮奚以任本非
凌霄姿安事萬里岑俯仰天地寬去住靡所禁眄惟榆枌
間一枝亦足耽念彼嚶鳴侶感愴動微吟
我行指杪秋冬始猶未發家書促數來欲住不可歇戒僕
膏我車抗手與君別別君更何言我言羞譎劣遭逢盛明
時努力希前哲君子重修名同心願所結

山居雜感二首

巖居謝塵鞅靜然絕流心大道懸日月小儒爭古今元黃
戰蝸角啁啾亂蒿林競以耳目察巧欲奪陽陰江海日夜
流安能涿蹄泮先哲有遺言覽諷還研尋
舉世競奔悅斯文亦頽委陳古脫敝屣委心任模稜鵬運
遠為笑鼠腐啄自矜詎知理密察難以嗽譁騰大道本在
邇經訓斯服膺念彼昌黎言既往宜為懲

夏日山居同年邵叔山見過談論竟日因及其去
冬所貽詩走筆答之

故人投我詩一篇道是別久會乍心懽然爾時風霜飽辛
苦巖病遂復相鈎連陶公楮公搖手謝我去管城卻走不

得前徂冬及春涉維夏入山枯槁如逃禪詩囊蓋澁曠酬
答今始脫落諸熬煎圖書堆几復整理收召魂魄從丹鉛
自惟讀書有本末良友往復資磨礪疑慎言夙所守涉
筆猶恐叢尤愆六經分流角漢宋折衷大義徵聖賢羣言
淆亂總憑臆安得藉口忘蹄筌茲事體大力不任頑劣况
迫桑榆年我友孜孜事汲古孔堂汲冢交尋研願以藥石
攻我癖撤我豐蔀開光天山花半落烏聲寂君來雨過流

蒙泉

蒙泉在卓
雨亭下

許潢川隱居白茆素未識也以詩見投有相勉之
意次韻酬之

小別鄉關十五霜歸與猶自絆名場君才伉爽無今態我

道迂踈近古狂下榻偶因陳仲舉授經孰是士孫張秋來
擬溯蒹葭水可許握衣君子堂

東徐徵君迴溪

先生尙隱湖山曲白波青障圍村屋石湖之畔畫眉西拄
杖芒鞋時往復先生少年意氣豪右手握槩左縛虢忽然
一飲上池水脫棄宿物羞巾袍憶昔蒹葭溯浩淼清樽夜
泛芙蓉沼檀板徵歌樂府傳長安重見人皆老自從肘後
通心符神工不數俞與盧徵書下賁趨召急海內喧傳
天子呼 天子呼來上左个羣公傾倒虛賓座聞道先生
不愛官 詔許歸田安枕卧我亦蒙 恩歸養病先生惠
然枉道過瓊臺玉液贈稠密移書諄復相規磨舊交零落

幾人在只有先生顏不改入手湖山許我分暮雲捲雨知

相待

先生新築畫眉泉
別業移書相招

綠牡丹次許二禹峯韻

翠苞初拆出叢分雨後烟深滯綠雲僻愛遠山參樹色斜
臨春水作波紋誰彈柳汁留仙佩漫惹苔痕入舞裊偶續
清平酬李白一杯重碧共醺醺

題魚東川耦耕圖

耦者爲蘇子舍

東川先生廉吏後蠹書蝕古窮二酉卻謝囂塵書掩門只
有眉山稱石友乘車戴笠恥不言合陌連阡約終畝眉山
奄忽願弗讐蕭蕭愁絕東川叟當年有耦不得田此日無
田更無耦耦去田空感慨生君心有耦終不朽我聞在昔

程與錢曾見初盟棄敝帚可憐尙書再出山安能強彼同
胼手先生風義高前人平生之言久要守流入丹青作話
傳不耦之耦耦斯久

積陰初霽坐春風樓對五老峯

重陰曖曖雨不收匡廬三月如深秋快睹朝曦出東海始
覺身坐春風樓四山翕沓雲影散五老離立迎清眸稜稜
瘦骨七千丈蒼茫甲子難稽勾九奇七賢總邱垤俯瞰彭
鄱皆浮漚老人好客盛投贈筆力只有青蓮道我欲忘言
不能罷落紙又恐山靈羞斜陽倒影發空翠松風謾謾如
聞謳

遊玉淵三峽澗抵棲賢寺

首夏雨初霽前溪水潺湲

書院前有澗
各貫道溪

觀泉動夙慕陟巘

尋棲賢山行怯登頓縛竹從人肩峻嶒澀鳥道逶迤紆水
田方出五老右漢陽復表延連崗隱重複目討不得全轉
西結緇宇竹林相鈎連殷殷響砰磕乃在崖壁間攢流急
奔馬拘迫發狂顛水石雨不降終古爭虓喧浮梁裊相拄
斷山立之鍵其下爲金井其上爲玉淵玉淵獨晃朗幻態
不可原坂石白羊散羣溪入漚漩忽然阻大石列竇當其
前下潭更深阻欲注勢不便鬱怒氣彌奮飛激欲上天上
天竟不得一落轟雷鞭駭愕不敢逼四山寒雪濺窈窕入
幽谷古寺紀唐年愼我念前哲往蹟靡留沿老僧靜無語
松風散夕烟

遊青玉峽觀瀑布

昔我居京師夜夢觀廬瀑今來廬山遊次第動幽矚已溯
三峽源回身撫青玉青玉何嶙峋高寒隱晴旭雙劍峯名在青
後玉峽割星漢瀕洞破其腹白霓九天垂下有怒龍觸龍怒
奪空去百怪助嘯暑歎落萬珠璣的爍搖我目入潭遂安
流瀾漫布平麓余從三峽來俯瞰盡深曲再上漱玉亭在
峽下仰觀乃不足瑟馭涼風生竚久不能續

廬山有松生絕頂高僅尺許蒼古如數十年物樵
者扳壁取之買而栽諸養益翠色可愛為紀以
詩

昔年老龍拔山去流涎散落巉巖處朝光夕影摩盪成化

作離奇尺許樹樹尺許勢千尋之而怒出虬鬚森回風夜
薄猶龍吟吁嗟樵子蠢無識便欲薪之同楚棘老夫斗米
易之歸移向清齋勤護惜日皚皚露濃濃不加剪拜滋丰
茸我亦劉累解擾龍

舟泊滕王閣下時北平王蘭谷孝廉以就婚至豫
章造余舟次遂共登覽蓋去癸亥登此閣時已
閱二十有三年矣感而賦此

雙丸跳盪迅不停流雲重卷西山青有客萬里忽促膝攜
手直上攀飛櫺回頭顧問舊題字館人指說前年事舊有
載斗墨登閣書鳶飛魚躍四字於屏字盈文章法閩人
道古絕可愛館人言去歲官新此閣命去之矣三王賦
記總不存獨有官人額鱗次王生年少不知愁我昔來時

方九秋江樓屹屹只如此江水照人驚白頭此間冠蓋盛
交際那許閒人得閒住幾聲呵殿大官來一雙白鷺橫江
去

康郎山阻淺

重湖水落洲渚紛三日不去康山雲當時偽漢百萬艘一
宵盡被長鯨吞我觀彭鄱釜之底敵來深入同孤豚若使
嚴師鎖北口大兵直壓南湖濬長圍一月敵坐困安得浪
戰成崩奔乃知友諒齷齪耳沐猴而冠詎足論漁歌四起
漁鼓急夜半如聞江左軍

常山舊館阻雨

雨滑前山路言從舊館臨客紛喧展齒主熟諳鄉音小住

猶常事重來詎夙心平生多浪跡回首莫相尋

白鶴觀

觀有樹曰葆大數十圍高數十
似開元中道士劉混成所植

晨發龜山麓斜傍紫石溪度坂日背出穿崖雲側飛白鶴
逝不返喬木徒萋萋沉沉蔭幽壑迢迢拂青霓廬阜古木
森皆其孫與兒樹間兩三屋殘額猶舊題仙靈渺何處不
能獲所栖恟怳此邂逅極目西山西

凌霄洞

五老之西南短峯曰凌霄有石大數畝怒突山之腰蹲或
象伏虎竦或象騰蛟疑有巨靈劈五丁加鏤雕摩豁見門
戶洞達成軒窳危石疊撐柱穹上為圍橋中有石刻古年
月紀宋朝洞外路迴阻螺旋上其椒修藤落空翠丹葩爍

奇標茲是古佛場靜然絕塵囂卑乃不可踰振古凌霄高

木瓜洞

穿雲度竹徑適自巢松來巢松即新安寺於此少憩即從後園叢竹中出木瓜滿

崖谷在昔仙者栽仙者曠不接古洞生莓苔靈區隔塵境

爛然山花開

白石院

晴巒豁秋爽朝光淡相涵言尋遠公約扳蘿陟重巖廣屋

隱巖腹漫漫白雲緘院之北崖為白雲洞老僧服丹砂院倚朱砂峯渥顏

陋瞿曇引我南嚮望即目吳楚兼彭鄱渺杯勺芥舟影廉

織回身揖五老九天下旒驂慨焉念蘇李往跡日以淹羽

陵既遭蠹囊書汚奸貪環諷晦翁詩風雅誰為參上方鐘

碧寂清籟聞松杉

哭同年陳荔汀時令姪宗江顧余白鹿書院

清宦十年棠蔽芾吳江一別玉摧傷贈言愧負人千古掛

劍空餘淚幾行君屢索贈言作此以存挂劍之意白髮衰顏支病骨時余方病

篤青山妖夢破流光白髮故交盡青山落葉多餘夢中句也阿咸惠顧追前

事幽咽泉聲送夕陽

遂淇泊舟鉛山潘明府道過見訪惠示鄒匪石先

生達觀樓集即贈

千里孤舟載月回忽傳騶從過江來微名詎意千清聽吾

道終須屬雅材鹿洞空傳前哲遠鷺湖直待使君開時鉛山重

設鷺湖書院殷勤惠我前賢卷為取征襟洗盪埃

哭邵太史叔六三首

涼飈動秋晏高柯條以凋悼此妖夢踐摧我金石交與君
 數日違驚見神理消微病錮惡石計詘心煩歎一昔遂干
 古彭咸不能招翹首向天問蒼蒼鬱沉寥
 與君共蘭譜結歡三十年高才發春藻撫翼摩中天伸屈
 於我異微尚竊同焉強歲謝朝黻所志安林泉鶴書屢呼
 召願以檇自全以此式矜躁嗚呼豈不賢
 嗟余晚菑播引年迫桑榆移家託鄰好卜築城東隅分攜
 忽三載近甫浹懽娛夫君富學殖庶為來者扶何期逝川
 駛遂令吾道孤已矣復何言欲言咽已枯

寶刀篇為龔司馬梧生同年作

轟雷夜破夏雨驕空中跳盪千年蛟倏然雨散雷亦收落
 手化作昆吾刀此刀應是健者使曾截鯨鯢去聲犀兕將
 軍老去刀徒為繡澀莓苔掛塵市百鍊良金軟若絲橫鋒
 一刺霜滿天精芒切切射牛斗魑魅竄伏誰能前我友珍
 之逾拱壁魚鬚作靶雕金秘一朝光彩出人間座上傳觀
 風颯颯

題祝允明草書卷為梧生作

枝山草書不師古不數張顛並懷素酒酣興發旁若無臨
 池便作公孫舞十丈松皮靜几披墨光上下騰蛟螭旁交
 午台勢糾結條復漫浪縱橫馳轟若長劍鬪箕斗怪若山
 魑凸顛醜斜飛側點錯落施紙上蛟蛟跳蚪蚪千形萬態

能事全定父題詩好句傳梧生謂余盍賦此輪斤伊鼎微

難宣

...

...

...

...

東先生文錄卷八終

